

ps：繁体应作“歐陽脩”，但由于网站标题字体库不全，此处以“修”代替，见谅。

▲ 题图 宋 梁楷 柳溪卧笛图

---

## 01

### 七交七首 其七 自叙

余本漫浪者，兹亦漫为官。  
胡然类鸱夷，托载随车辕。  
时士不俛眉，默默谁与言。  
赖有洛中俊，日许相跻攀。  
饮德醉醇酎，袭馨佩春兰。  
平时罢军檄，文酒聊相欢。

## 02

### 临江仙 其一

柳外轻雷池上雨，  
雨声滴碎荷声。  
小楼西角断虹明。  
阑干倚处，待得月华生。

燕子飞来窥画栋，  
玉钩垂下帘旌。  
凉波不动簟纹平。  
水精双枕，畔有堕钗横。

## 03

### 踏莎行

候馆梅残，溪桥柳细，  
草薰风暖摇征辔。

离愁渐远渐无穷，  
迢迢不断如春水。

寸寸柔肠，盈盈粉泪，  
楼高莫近危栏倚。  
平芜尽处是春山，  
行人更在春山外。

## 04

### 晚泊岳阳

卧闻岳阳城里钟，系舟岳阳城下树。  
正见空江明月来，云水苍茫失江路。  
夜深江月弄清辉，水上人歌月下归。  
一阕声长听不尽，轻舟短楫去如飞。

## 05

### 戏答元珍

春风疑不到天涯，二月山城未见花。  
残雪压枝犹有橘，冻雷惊笋欲抽芽。  
夜闻归雁生乡思，病入新年感物华。  
曾是洛阳花下客，野芳虽晚不须嗟。

## 06

### 春日西湖寄谢法曹歌

西湖春色归，春水绿于染。  
群芳烂不收，东风落如糝。  
参军春思乱如云，白发题诗愁送春。  
遥知湖上一樽酒，能忆天涯万里人。  
万里思春（君）尚有情，忽逢春至客心惊。

雪消门外千山绿，花发江边二月晴。  
少年把酒逢春色，今日逢春头已白。  
异乡物态与人殊，惟有东风旧相识。

## 07

### 临江仙 其二

记得金銮同唱第，春风上国繁华。  
如今薄宦老天涯，  
十年歧路，空负曲江花。

闻说阆山通阆苑，楼高不见君家。  
孤城寒日等闲斜，  
离愁难尽，红树远连霞。

## 08

### 采桑子 其三

画船载酒西湖好，急管繁弦。  
玉盏催传，稳泛平波任醉眠。

行云却在行舟下，空水澄鲜。  
俯仰流连，疑是湖中别有天。

## 09

### 朝中措 送刘仲原甫出守维扬

平山阑槛倚晴空。山色有无中。  
手种堂前垂柳，别来几度春风。

文章太守，挥毫万字，一饮千钟。  
行乐直须年少，尊前看取衰翁。

